

## Tragóid sa Fhrainc

### Ceist 1

Beidh tú ag féachaint ar ball ar thuairisc faoi lámhach in Toulouse na Fraince. An dtuigeann tú na focail seo a bheidh sa tuairisc?

príobháideach	Giúdach	dúnmharfóir	
	ar a thóir	ionsaí	alltacht
leathchéad	scútar cumhachtach	i gcuimhne na ndaoine	

### Ceist 2

Úsáidtear a lán briathra sa mhír – an bhfuil siad ar eolas agat? Muna bhfuil tú cinnte labhair leis an duine in aice leat. Bígí in ann a rá cén aimsir lena mbaineann siad chomh maith.

Maraíodh: \_\_\_\_\_  
D'éalaigh: \_\_\_\_\_  
Dúirt: \_\_\_\_\_  
Tuairiscítear: \_\_\_\_\_  
Thosaigh: \_\_\_\_\_  
Bhí: \_\_\_\_\_  
Thug: \_\_\_\_\_  
Tá: \_\_\_\_\_  
Úsáideadh: \_\_\_\_\_  
D'iarr: \_\_\_\_\_

### Ceist 3

Anois féach ar an tuairisc agus cuir líne faoin fhocal cuí le léiriú an bhfuil na ráitis thíos fíor nó bréagach!

1. Maraíodh ceathrar taobh amuigh de scoil phríobháideach Ghiúdach.  
**Fíor/ Bréagach**
2. D'éalaigh an gunnadóir ar scútar agus tá na Gardaí sa tóir air go fóill.  
**Fíor/ Bréagach**
3. Bhí deacracht ag an dúnmharfóir leis an dara gunna a bhí aige.  
**Fíor/ Bréagach**
4. Níl an scoil a bhfuil mac Bhairbre Ní Chiosáin ag freastal uirthi ag ligean aon duine isteach ar chor ar bith.  
**Fíor/ Bréagach**
5. Maraíodh triúr saighdiúirí go dtí seo.  
**Fíor/ Bréagach**
6. D'iarr Nicolas Sarkozy ó Pháras inniu ar gach duine nóiméad ciúnais a bheith acu.  
**Fíor/ Bréagach**

**Ceist 4** ‘...ceathrar – triúr páistí...’

I. Cén Ghaeilge atá ar na focail seo:

*one person, two brothers, six players, eight workers, two friends*

II. Cuir na ceisteanna seo ar an duine in aice leat:

- Cé mhéad deirfiúr agus deartháir atá agat?
- Cé mhéad aintín agus uncail atá agat?
- Cé mhéad cara is fearr atá agat?

**Ceist 5**

Luaitear na focail ar chlé sa tuairisc agus tá focail a bhfuil an míniú céanna acu (nó cosúil leo) sa cholún ar dheis – an féidir leat iad a mheaitseáil?

Bí ag obair leis an duine in aice leat.

- |     |                     |    |                  |
|-----|---------------------|----|------------------|
| 1.  | eachtra             | a. | de bhrí          |
| 2.  | ag caitheamh le     | b. | faoi láthair     |
| 3.  | timpeall air        | c. | ag scaoileadh le |
| 4.  | d'éalaigh sé        | d. | imeacht          |
| 5.  | ar a thóir          | e. | in aice le       |
| 6.  | toisc               | f. | theith sé        |
| 7.  | leathchéad          | g. | d'fhiafraigh sé  |
| 8.  | gar do              | h. | ina dhiaidh      |
| 9.  | i láthair na huaire | i. | thart air        |
| 10. | d'iarr sé           | j. | caoga            |

1	2	3	4	5	6	7	8	9	10
d									

**Ceist 6**

Déan liosta de na mothúcháin a bhraitheann tú nuair a chloiseann tú scéal mar seo.

**Treoracha agus Freagraí**

**Ceist 1** - Tá an cheist seo le déanamh sula seinntear an tuairisc.

príobhaideach – private  
Giúdach – Jewish  
dúnmharfóir – murderer  
ar a thóir – after him  
ionsaí – attack  
alltacht – astonishment  
leathchéad – fifty  
scútar cumhachtach – powerful scooter  
i gcuimhne na ndaoine – in memory of the people

**Ceist 2**

Maraíodh: to kill (maraigh) / was killed / aimsir chaite, briathar saor  
D'éalaigh: to escape (éalaigh) / escaped / aimsir chaite  
Dúirt: to say (deir) / said / aimsir chaite  
Tuairiscítear: to report (tuairiscigh) / is reported / aimsir láithreach, briathar saor  
Thosaigh: to start (tosaigh) / started / aimsir chaite  
Bhí: to be (bí) / was / aimsir chaite  
Thug: to give (tabhair) / gave / aimsir chaite  
Tá: to be (bí) / am, are, is / aimsir láithreach  
Úsáideadh: to use (úsáid) / was used / aimsir chaite, briathar saor  
D'iarr: to ask (iarr) / asked / aimsir chaite

**Ceist 3**

1. Fíor
2. Fíor
3. Bréagach
4. Bréagach
5. Fíor
6. Bréagach

**Ceist 4**

- (i) one person – duine amháin  
two brothers – beirt deartháireacha  
six players – seisear imreoirí  
eight workers – ochtar oibríthe  
two friends – beirt chairde
- (ii) Téigh siar ar na rialacha a bhaineann leis na huimhreacha pearsanta.

1	2	3-10
An t-ainmfhocal + amháin	Ginideach iolra agus séimhítear an t-ainmfhocal ina dhiaidh ach amháin má thosaíonn sé le d, t, s, l, n	Ginideach iolra agus ní séimhítear an t-ainmfhocal ina dhiaidh.

**Ceist 5**

1	2	3	4	5	6	7	8	9	10
d	c	i	f	h	a	j	e	b	g

**Ceist 6**

Is féidir gach beirt a chur le chéile leis an cheacht seo a dhéanamh.

### Eimear Ní Chonaola

Sa Fhrainc maraíodh ceathrar – triúr páistí agus múinteoir scoile – taobh amuigh de scoil phríobháideach Ghiúdach in<sup>1</sup> Toulouse, i ndeisceart na tíre. D'éalaigh an dúnmharfóir ar scútar agus tá póilíní fós á<sup>2</sup> chuardach<sup>3</sup>. Dúirt uachtarán na Fraince, Nicolas Sarkozy gur tragóid don tír ar fad a bhí in eachtra an lae inniu.

Ag a hocht a chlog ar maidin agus páistí á dtabhairt chuig an scoil ag tuismitheoirí tuairiscítear gur tháinig fear ar scútar dubh agus gur thosaigh sé ag caitheamh le chuile<sup>4</sup> duine a bhí timpeall air – páistí chomh maith le daoine fásta. Le linn don ghunnadóir a bheith ag caitheamh bhí deacracht aige le gunna amháin ach bhí an dara gunna aige. Theith sé ar scútar dubh agus tá na póilíní ar a thóir.

### Bairbre Ní Chiosáin

Tá gach duine ag caint faoi seo agus níl aon rud eile á phlé ach seo, toisc is dócha, gur ionsaí ar scoil a bhí i gceist, ar scoil Ghiúdach, scoil Ghiúdach inár maraíodh páistí, agus is dóigh liom go bhfuil alltacht ar gach duine. Agus tá gach duine, caithfidh mé a rá, an-neirbhíseach, do thug mé faoi ndeara. I scoil mo mhic<sup>5</sup> féin tráthnóna tá na doirse dúnta agus níl siad ag ligean daoine isteach mura mbuaileann tú ar chloigín, agus tá teoracha ag chuile scoil anois a bheith an-chúramach<sup>6</sup> agus cúrsaí slándála a threisiú<sup>7</sup>, so tá gach duine, cinnte, an-mhíchompordach ar fad.

### Eimear Ní Chonaola

Seo é an tríú heachtra<sup>8</sup> lámhaigh<sup>9</sup> sa réigiún le breis is seachtain anuas. Cheana féin tá leathchéad póilín ag fiosrú eachtra lámhaigh eile a tharla Déardaoin seo caite i mbaile Montauban, gar do Toulouse, inár maraíodh beirt saighdiúirí<sup>10</sup>. Maraíodh saighdiúir eile an deireadh seachtaine na seachtaine seo caite in Toulouse. Níl de cheangal i láthair na huaire idir na heachtraí ar fad ach go raibh an gunnadóir ag taisteal ar scútar cumhachtach agus go raibh na gunnaí céanna in úsáid aige agus a úsáideadh inniu. D'eitil Uachtarán na Fraince, Nicolas Sarkozy go Toulouse níos luaithe agus d'iarr sé ar chuile scoil sa Fhrainc nóiméad ciúnais a bheith acu amárach i gcuimhne na ndaoine a maraíodh.

<sup>1</sup>Moltar 'in' a úsáid roimh ainm áite nach ainm tíre é agus nach bhfuil litriú Gaeilge aige

<sup>2</sup>'dhá' a deirtear sa chaint i gcanúint Chonnachta

<sup>3</sup>'cuartú' a deirtear sa chaint go minic

<sup>4</sup>'gach uile' a mholtar sa chaighdeán

<sup>5</sup>'mo mhac' a deirtear

<sup>6</sup>'ana' a deirtear sa chaint i gcanúint na Mumhan

<sup>7</sup>'tréanadh' a deirtear

<sup>8</sup>'eachtra' a deirtear

<sup>9</sup>'lámhach' a deirtear

<sup>10</sup>'shaighdiúirí' a deirtear